

PREDGOVOR

Studija percepcije korupcije u Bosni i Hercegovini predstavlja jedinstveni pokušaj nevladinog sektora da širom aktivnošću uspostavi bazičnu dijagnozu ovog akutnog društvenog problema, kao i da stvori instrument za njegovo kontinuirano praćenje. Cilj projekta bilo je kreiranje baze podataka za cijelu zemlju sa detaljnim podacima po sektorima, nivoma vlasti, institucijama itd. pri čemu će građani dati svoj sud, do koje mjere se korupcija ukorijenila u društvu, kao i svoje viđenje na koji način joj se najbolje suprotstaviti. Publikovanje rezultata, posebno u predizbornoj periodu 2002.g. dio je strategije **Transparency International BiH** (TI BiH) da vlastodržcima ukaže na sve njihove dosadašnje neuspjehe i nametne novu agendu za opšte izbore, te želju građana da BiH konačno krene sa uvođenjem pravne države, na šta se uzaludno čekalo skoro sedam godina po okončanju ratnih dejstava.

Jedini dosadašnji pokušaj ove vrste provela je Svjetska Banka na zahtjev vlada u BiH sa svojom Dijagnostičkom studijom o korupciji u BiH i to u periodu jun-septembar 2000.g. što je već zastarjelo vremenski, ali pomaže i poslužilo je i ovoj studiji u mjerenu eventualnih promjena unutar prethodne dvije godine. Valja ipak istaći da je istraživanje Svjetske Banke rađeno uz pomoć međunarodnih konsultanata i ne predstavlja krajnji domaći proizvod Bosne i Hercegovine. Time se i ukazala potreba za novim dijagnostičkim mehanizmom.

Studija koja je pred Vama, sistematski obrađuje fenomen korupcije u BiH. Zasniva se na bazi podataka koja je profesionalno napravljena anketiranjem građana na teritoriji čitave države, a koju je za potrebe TI BiH u februaru i martu 2002.g. obavila Agencija za marketinški konsalting – **Partner**, Banja Luka. Sama baza podataka sastoji se od preko 900 stranica materijala, tabela i grafikona, koji daju pregled svih odgovora, te statistički najznačajnijih demografskih ukrštanja, kao i regionalne preglede. Čitava studija je zasnovana upravo na tim rezultatima, a dio materijala iz te opsežne baze naveden je i obrađen u tekstu.